



**XEERKA HAB-DHAQANKA AXSAABTA QARANKA EE DIIWAANGELINTA  
CODBIXIYAYAASHA**  
**(Voters' Registration Code of Conduct for the Political Parties)**

**TUSMADA XEERKA HAB-DANQANKA (Code of Conduct Arrangements )**

Aaraar	Preamble
Qodobka 1 Magaca Xeerka	Article 1 Name of the Code
Qodobka 2 Macnaha eray-bixinta	Article 2 Definitions
Qodobka 3 Dabbaqaadda Xeerka	Article 3 Scope of the Code
Qodobka 4 Mabaadii'da guud	Article 4 General principles
Qodobka 5 Ujeeddada Xeerka hab-dhaqanka	Article 5 Objects of the Code
Qodobka 6 Ku dhaqanka Xeerka	Article 6 Compliance with the Code
Qodobka 7 Waxyaabaha ka reebban xisbiyada wakhtiga diiwaangelinta	Article 7 Matters parties are forbidden to undertake during the registration
Qodobka 8 Reebbanaanta isticmaalka iyo haysashada noocyada hubka	Article 8 Prohibition of the use and possession of weapons
Qodobka 9 Geeddi-socodka diiwaangelinta	Article 9 Progress of the registration
Qodobka 10 Adeegsiga saxaafadda	Article 10 Use of the media
<i>Guddida Farsammo (Technical Committee)</i>	<i>Technical Committee</i>
Qodobka 11 Aasaasid	Article 11 Establishment
Qodobka 12 Ujeeddada Guddiga Farsammo ee Hawlaha Diiwaangelinta Codbixiyayaasha	Article 12 Objects of the Voters' Registration Activities Technical Committee
Qodobka 13 Xilka iyo waajibaadka Guddiga Farsammo ee Hawlaha Diiwaangelinta Codbixiyayaasha	Article 13 Functions and duties of the Voters' Registration Activities Technical Committee
Qodobka 14 Wakiilada xisbiyada	Article 14 Parties' representatives
Qodobka 15 Waajibaadka iyo masuuliyadda wakiillada axsaabta qaranka	Article 15 Duties and responsibilities of the national parties' representatives
Qodobka 16 Guddida Ilaalinta iyo Habsami-socodka Diiwaangelinta Codbixiyaasha (Monitoring Board)	Article 16 Monitoring Board for the Proper Conduct of the Voters' Registration
Qodobka 17 Xallinta khilaafaadka (conflict resolution)	Article 17 Conflict resolution
Qodobka 18 Cabashooyinka	Article 18 Complaints
Qodobka 19 Cabashooyinka been-abuurka ah	Article 19 Fictitious complaints
Qodobka 20 Tallaabooyinka laga qaadayo cidda Xeerkana jebisa	Article 20 Action to be taken against anyone who contravenes the Code
Qodobka 21 Ku dhaqanka iyo wax ka beddelka Xeerkana	Article 21 Application and Amendments of the Code
Qodobka 22 Awoodda saxeexa SAXEEEXAYAASHA	Article 22 Power to sign SIGNATORIES

<b>REPUBLIC OF SOMALILAND</b> <b>NATIONAL ELECTORAL COMMISSION</b>		<b>JAMHUURIYADDA SOMALILAND</b> <b>GUDDIDA DOORASHOOYINKA QARANKA</b>
---	---	--

**XEERKA HAB-DHAQANKA AXSAABTA QARANKA EE DIIWAANGELINTA  
CODBIXIYAYAASHA**

Ref: KDQ/XK/501/16

Taar: 07/01/2016

**AARAAR:**

*Axsaabta Qaranka ee Jamhuuriyadda Somaliland:*

- *Iyagoo* ogsoon muhiimadda Diiwaangelinta codbixiyayaashu ay u leedahay geedi-socodka dimuquraadiyadda dalka Jamhuuriyada Somaliland;
- *Iyagoo* garawsan in diiwaangelinta codbixiyayaashu ay laf dhabar u tahay doorasho xor iyo xalaal ah;
- *Iyagoo* garawsan in Komishanka Doorashooinka Qaranka, Hay'adaha Cadaaladda iyo Warbaahintu ay u madaxbannaan yihiin hawlahooda isla markaana ay ka madaxbannaan yihiin Axsaabta Qaranka;
- *Iyagoo* ogsoon in meel looga soo wada jeedo danta iyo maslaxadda guud ee dalkan Jamhuuriyadda Somaliland, isla markaana sida Dastuurka iyo Shuruucda Doorashooinku ay jideeyeen si nabad-gelyo ah ugu loollamaya hoggaanka siyaasadeed ee dalka;

**Waxa ay ku heshiiyeen in ay u hogaansamaan Xeerkan Hab-dhaqan (Code of Conduct for Political Parties) kaas oo ay Axsaabta Qaranku si wada jir ah isula oggolaadeen iyadoo ay Axsaabta Qaranka iyo Komishanka Doorashooinka Qaranku (KDQ) wada saxeexeen maanta oo ay taariikhdu tahay 07 Janaury 2015.**

**QODOOKA 1<sup>aad</sup>: MAGACA XEERKA**

Xeerkan waxaa loogu yeedhayaa “Xeerka Hab-dhaqanka Axsaabta Qaranka ee Diiwaangelinta Codbixiyayaasha”.

**QODOOKA 2<sup>AAD</sup>: MACNAHA ERAY-BIXINTA**

- 1) “Komishan”: Waxaa loola jeedaa Komishanka Doorashooinka Qaranka.
- 2) “Xisbiyadda”: Waxaa loola jeedaa sadexda xisbi qaran.
- 3) “Diiwaangelin” waxa loola jeedaa Diiwaangelinta Codbixiyayaasha.

- 4) “**Mas’uul Xisbi**”: Waxaa loola jeedaa mas’uuliyiinta kala duwan ee Xisbiyadda Siyaasadda.
- 5) “**Guddida Farsammo**” Waxa loola jeedaa Guddida farsammo ee lagu aasaasay Xeerka Diiwaangelinta Codbixiyayaasha.
- 6) “**Wakiil Xisbi**” Waxa loola jeedaa xubinta uu xisbi usoo magacaabo goobaha diiwaangelinta Codbixiyayaasha.
- 7) “**Xubin Xisbi**” waxa loola jeedaa xubnaha u diiwaangashan Axsaabta Qaranka.

### **QODOOKA 3<sup>AAD</sup>: DABBAQAADDA XEERKA**

Xeerkan Hab-dhaqan waxaa lagu dabbaqayaa, kuna dhaqmaaya dhammaan hoggaamiyeyaasha Axsaabta Qaranka, mas’uuliyiinta Axsaabta Qaranka, mas’uuliyiinta dawladda ee leh magacaabista siyaasadeed, xubnaha Axsaabta Qaranka, iyo taageerayaasha lagu yaqaan in ay xisbi u ololeeyaan.

### **QODOOKA 4<sup>AAD</sup>: MABAADII’DA GUUD**

Sharcnimadda (legitimacy) diiwaangelin codbixiye oo sax ahi oo ku salaysan xog sax ahi waxa ay ku iman kartaa:

- 1) Marka is-diiwaangeliyayaasha lagu war-geliyo, laguna wacyi-geliyo qaabka la isku diiwaangelinaayo iyadoo taas loo maraayo olole wacyi gelineed oo taabo gal ah;
- 2) Marka ay is-diiwaangeliyayaashu isku diiwaangeliyaan iyaga oo aan ku celcelinayn;
- 3) Marka ay Axsaabta Qaranka iyo hoggaamiyeyaashoodu si niyad-sami ah (good faith) ugu dhaqmaan una ixtiraamaan Xeerka Hab-dhaqanka Axsaabta Qaranka ee Diiwaangelinta Codbixiyayaasha, Xeerka Diiwaangelinta Codbixiyayaasha, Xeer-nidaamiyaha Diiwaangelinta Codbixiyayaasha, Xeerarka Doorashooyinka, Xeerka Nidaamka Axsaabta/Ururrada Siyaasadda iyo Dastuurka;
- 4) Diiwaan gelin sax ahi waa xogta ugu saxsan ee lagu geli karo doorasho xor iyo xalaal ah.

### **QODOOKA 5<sup>AAD</sup>: UJEEDDADA XEERKA HAB-DHAQANKA**

- 1) Ujeedada Xeerkan Hab-dhaqanka Axsaabta Qaranku waa in kor loo qaado waxyaalaha suurto gelin kara inay dhacdo diiwaangelin sax ah oo aan khalad lahayn.
- 2) In laga hortago in muwaadiniintu ay isku dayaan in ay is-diwaangeliyaan wax ka badan hal mar.
- 3) In Axsaabta Qaranku la socon karaan una kuurgali karaan habsami u socodka diiwaangelinta, iyaga oo ka dheeraanaya wax kasta oo khalkhal galin kara habsami u

socodka diiwaangelinta saamayna ku yeelan kara natijada kasoo bixi doonta diiwaangelinta.

- 4) In sida ugu haboon wax looga qabto cabashooyinka iyo khilaafaadka ka yimaada dhaqangelinta diiwaangelinta codbixiyayaasha loona helo xal lagu saxayo cabashooyinka ka yimaadda Axsaabta Qaranka.

#### **QODOBKA 6<sup>AAD</sup>: KU DHAQANKA XEERKA**

Axsaabta Qaranku iyaga oo fulinaaya Xeerkan Hab-dhaqanka waa:

- 1) Inuu Xisbi kastaa muujiyo inuu u hoggaansan yahay ku dhaqanka Xeerkan;
- 2) Inay ku wacyigeliyaan, Wakiillada Xisbiyada, xubnaha xisbiga iyo madaxdaba in ay ku dhaqmaan isla markaana ixtiraamaan meel-marinta iyo ku dhaqanka Xeerkan;
- 3) Inay adkeeyaan joogteeyaanna wada shaqaynta ka dhaxaysa Komishanka Doorashooyinka Qaranka;
- 4) Inuu qaado tallaabo kasta oo suurtgal ah inaan la dhiirri-gelin wax kasta oo jabinaaya ama carqaladaynaaya Xeerkan;
- 5) In uu cambaareeyo fal kasta oo minjo xaabin kara qabashada diiwaangelin sax ah oo xalaal ah.
- 6) Inuu ballan qaado inuu aqbalayo natijada ka soo baxda diiwaangelinta codbixiyayaasha ama ka keeno cabasho muddo 7 casho gudaheed ah, haddii uu ku qanci waayo liiska kama dambaysta ah ee Diiwaangelinta Codbixiyayaasha.

#### **QODOBKA 7<sup>AAD</sup>: WAXYAABAHA KA REEBBAN XISBIYADA WAKHTIGA DIIWAANGELINTA**

Xisbi kasta waxaa ka reebban:

- 1) Inuu ku kaco hawlo wiiqi kara ama waxyeello u gaysan kara nabadgelyada iyo deggenaanshaha dalka ka hor diiwaangelinta, diiwaangelinta dhexdeeda, ama diiwaangelinta ka dib.
- 2) In uu ku dhiiri-geliyo xubnaha xisbiga ama taageerayaashiisa in ay hal mar wax ka badan is-diiwaangeliyaan.
- 3) In uu u fududeeyo xubnaha xisbigiisa ama taageerayaashiisa in ay qaataan hal kaadh wax ka badan.
- 4) Inuu adeegsado hadallo aflagaado ah ama meel ka dhac ah oo sababi kara rabshado gacan-ka-hadal ah wakhtiga diiwaangelintu socoto.
- 5) Inuu baqo-geliyo is-diiwaangeliya, wakiillada xisbiyadda, shaqaalah Komishanka.

- 6) Inuu arbusho ama khalkhal geliyo diiwaangelinta codbixiyayaasha.
- 7) Inuu is-hortaago qaybinta qoraalada, ama muujinta hal-ku-dhegyo loogu talo galay wacyigelinta diiwaangelinta codbixiyayaasha.
- 8) Inuu jeex-jeexo, baabi'yo ama ku kaco fal kasta oo wax u dhimaaya gudbinta farriinta ay xambaarsan yihiin qoraalladda, calaamadaha, iyo boodhadhka diiwaangelintu;
- 9) Inuu u diido qofnaba, inuu ka qayb galoo diiwaangelinta codbixiyayaasha.
- 10) Inuu u oggolaado taageerayaasha Xisbigiisa inay ku kacaan wax kasta oo diiwaangelinta dhaawacaaya.
- 11) Inuu sameeyo obole ama bannaan-baxyo siyaasadeed oo uu kaga soo hor jeedo diiwaangelinta codbixiyayaasha.
- 12) Inuu xoog ku qabsado goob diiwaangelineed ama u adeegsado qaabab sharci darro ah goob diiwaangelineed ama agabka iyo qalabka diiwaangelinta.

**QODOOKA 8<sup>AAD</sup>: REEBBANAANTA ISTICMAALKA IYO HAYSASHADA NOOCYADA HUBKA**

Xubnaha Axsaabta Qaranka, Wakiillada Axsaabta iyo taageerayaashhoodaba waxaa ka reebban kana mamnuuc ah in ay noocyada hubka kala duwan u soo qaataan goobaha ay ka socoto diiwaangelinta codbixiyayaashu.

**QODOOKA 9<sup>AAD</sup>: GEEDDI-SOCODKA DIIWAANGELINTA**

**A. KOMISHANKA WAXA KU WAAJIB AH:-**

- 1) In ay u gutaan waajibkooda si dhexdhedaadnimo ah oo hufan.
- 2) Komishanku waa in uu raacaa Xeerka Diiwaangelinta Codbixiyayaasha (Xeer Lr. 37/2007) ee wax-ka-bedelka iyo kaabista lagu sameeyay 2014, Xeer Nidaamiyaha iyo Xeerkhan Hab-dhaqan.
- 3) Komishanku waa in uu warbixin ka siiyaa Axsaabta Qaranka geedi-socodka Diiwaangelinta Codbixiyayaasha.
- 4) Komishanku waa in uu dadweynaha ku wacyi-geliyaa muhiimadda ay leedahay diiwaangelinta Codbixiyayaashu.

**B. XISBI KASTA WAXAA KU WAAJIB AH:-**

- 1) In uu ku dhaqmo Xeerka Diiwaangelinta Codbixiyayaasha, Xeer-nidaamiyaha Dhaqangelinta Diiwaangelinta Codbixiyayaasha, Xeerkarka Doorashooyinka ee dhaqangalka ah, iyo Xeerkhan Hab-dhaqankaba.

- 2) Inuu wada shaqayn la yeesho masuuliyiinta diiwaangelinta si loo xaqijiyo in diiwaangelintu u dhacdo si nabadgelyo iyo habsami ah kuna dhammaato si fiican.
- 3) In uu ilaaliyo nabadgelyada hawl-wadeennadda diiwaangelinta iyo masuuliyiinta Komishanka Doorashooyinka Qaranka xilliga diiwaangelinta.
- 4) In ay gacan ka siiyan hay'adaha nabadgelyadu in ay ka hor tagaan fal-dambiyeed kasta oo suurto-gal ah in uu dhaco xilliga diiwaangelinta kaasoo ku saabsan hawlaha diiwaangelinta (Registration Offences).
- 5) Inuu qaato tilmaan kasta oo sharci ah una hoggaansammo awaamiirta Komishanka Doorashooyinka Qaranka.
- 6) Inuu la sameeyo xidhiidh wanaagsan oo joogto ah Komishanka Doorashooyinka Qaranka, masuuliyiinta iyo hawl-wadeenadda Komishanka Doorashooyinka iyo Xisbiyada kale.
- 7) Inuu ka qayb qaato sugidda nabadgalyadda iyo badbaadada masuuliyiinta diiwaangelinta ka-hor diiwaan gelinta, diiwaangelinta dhexdeeda iyo ka-dib diiwaangelinta.
- 8) Inaanu si sharci darro ah u farogelin shaqada hawl-wadeenadda diiwaangelinta.
- 9) Inuu qaddariyo lana shaqeeyo goob joogayaasha (**observers**) iyo Guddida Farsammo ee diiwaangelinta.

#### **QODOBKA 10<sup>AAD</sup>: ADEEGSIGA SAXAAFADDA**

- 1) Axsaabta Qaranku waa in ay ka fogadaan baahinta wax kasta oo wax u dhimmi kara geedi-socodka Diiwaangelinta Codbixiyayaasha iyo nabadgelyadda Guud ee dalka JSL.
- 2) Xisbi kastaa waa in uu ixtiraamaa Xeerarka Dalka ee khuseeya madaxbanaanida saxaafadda, kana dheeraado in uu aflagaado iyo cay u mariyo xisbiyadda kale ama Komishankaba.
- 3) Axsaabta Qaranku waa in aanay marin habaabin ujeedooyinka Diiwaangelinta Codbixiyayaasha, kuna dhiirigeliyaan in ay bulshadu is-diiwaangeliso.
- 4) Axsaabta Qaranku waa in ay bulshada uga digaan in hal mar wax ka badan ay is-diiwaangeliyaan.

#### **GUDDIDA FARSAMMO (TECHNICAL COMMITTEE)**

#### **QODOBKA 11<sup>AAD</sup>: AASAASID**

- 1) Iyadda oo la raacayo Xeerka Diiwaangelinta iyo Xeer-nidaamiyaha Dhaqangelinta Diiwaangelinta Codbixiyayaasha waxa la aasaasi doonaa Guddida Farsammo ee Hawlaha Diiwaangelinta Codbixiyayaasha.
- 2) Xubnaha Guddidu waxa ay ka koobnaan doonaan:
  - a. Laba xubnood oo Komishanka Doorashooyinka Heer Qaran ah;
  - b. Laba xubnood oo ka socda Wasaaradda Arrimaha Gudaha;
  - c. Saddex Xubnood oo ka kala socda Axsaabta Qaranka.
- 3) Guddida Farsammo waxaa la hawl-gelinaya isla marka la ansixiyo Xeer nidaamiyaha waxaanay shaqadoodu dhammaanaysaa marka hawsha diiwaangelinta la dhammays tiro, lana soo saaro liiska ugu danbeeya. Hase yeeshee mar kasta oo ay Diiwaangelini jirto Guddida dib ayaa loo abuurayaan.
- 4) Guddida waxaa Guddoomiye iyo Ku-xigeen u ah labada Xubnood ee ka socda Komishanka Doorashooyinka.

**QODOBKA 12<sup>AAD</sup>: UJEEDDADA GUDDIGA FARSAMMO EE HAWLAHA  
DIIWAANGELINTA CODBIXIYAYAASHA**

1. Ujeeddada Guddida Farsammo waa:
  - a) In ay Komishanka ka caawiyaan habسامي u socodka hawlaha diiwaangelinta codbixiyayaasha.
  - b) In ay ka talo bixiyaan dhaqangelinta diiwaangelinta codbixiyayaasha.

**QODOBKA 13<sup>AAD</sup>: XILKA IYO WAAJIBAADKA GUDDIGA FARSAMMO EE  
HAWLAHA DIIWAANGELINTA CODBIXIYAYAASHA**

Xilka iyo Waajibaadka Guddidu waa:

- 1) In ay Komishanka kala taliyaan farsammo ahaan qaabka loo hirgalinayo diiwaangelinta codbixiyayaasha.
- 2) In ay kala qayb-galaan kana taageeraan wixii hawl ah ee Komishanku uga baahdo.
- 3) Ka talo bixinta caqabadaha farsammo ee laga yaabo in ay soo food saarto hawsha diiwaangelinta codbixiyayaasha.
- 4) In ay xidhiidhiyaan xafiisyadda ay matalaan iyo Komishanka;
- 5) In ay la socod siiyaan xafiisyadda ay matalaan geedi-socodka hawsha diiwaangelinta codbixiyayaasha.
- 6) In ay la socdaan nidaamka diiwaangelinta codbixiyayaashu uga socoto gobolada iyo degmooyinka dalka JSL, wixii tallo iyo tusaale ahna u gudbiyaan Komishanka.

- 7) Haddii Komishanku uga baahdo, in ay kala qayb-galaan wacyigelinta gobolada iyo degmooyinka si loogu baraarajiyo bulshada muhiimadda ay leedahay diiwaangelinta codbixiyayaashu.

#### **QODOBKA 14<sup>AAD</sup>: WAKIILADA XISBIYADA**

- 1) Saddexda xisbi qaran waxa ay u soo diran karaan goob kasta oo diiwaangelin ka dhacayso min hal wakiil. Waxa kale oo ay keeni karaan bedelkooda haddii ay maqnaadaan.
- 2) Wakiillada ay axsaabtu soo dirsadaan waa inay ku sugnaadaan goobahooda xilliyada hawsha diiwaangelintu socoto, soona jeediyaan wixii tabasho ama cabasho ah ee ay qabaan haddii ay jirto.
- 3) Wakiil kasta oo xisbi waa in uu ku dhaqmaa Xeerka Anshaxa Axsaabta Qaranka ee Diiwaangelinta Codbixiyayaasha, iyo shuruucda diiwaangelinta ee dhaqan galka ah.

#### **QODOBKA 15<sup>AAD</sup>: WAAJIBAADKA IYO MASUULIYADDA WAKIILLADA AXSAABTA QARANKA**

- 1) Wakiilada axsaabtu waxa ay hubinayaan in geedi-socodka diiwaangelintu waafaqsanyahay sharciga, waxana ay u kuurgali doonaan hawsha diiwaangelinta ee ay wadaan hawladeenadda diwaangelinta ee goobta uu ka hawlgalayo/so.
- 2) Wakiillada asxaabtu ma faro-gelin karaan mana carqaladayn karaan hawsha diiwangelinta ee socota;
- 3) Wakiillada axsaabtu waxa ay buuxin karaan foomamka cabashada haddii ay cabasho ka qabaan geedi-socodka diwaangelinta codbixiyayaasha goobta.
- 4) Wakiillada axsaabtu ma soo bandhigi karaan qoraal, calaamat, kaadh, ama qaab kale oo muujinaya in ay wakiillo ka yihii xisbi gaar ah, kamana dhix oleyn karaan goobta diiwaangelinta iyo agagaarkeedaba.

#### **QODOBKA 16<sup>AAD</sup>: GUDDIDA ILAALINTA IYO HABSAMI-U-SOCODKA DIIWAANGELINTA CODBIXIYAYAASHA (MONITORING BOARD)**

##### ***1. Ujeeddada loo Aasaasay Guddida:***

- A. Guddida Ilaalinta Habsami-u-Socodka Diiwaangelinta waxa loo aasaasay kor-u-qaadista suurto-galnimada in ay diiwaangelin sax ahi dalka ka qabsoonto, iyo in ay diiwaangelintaasi ku qabsoonto kuna gebo-gebawdo turxaan la'aan, si waafaqsan Sharciga iyo Xeerarka dalka.

##### ***2. Xilka Guddida Guddidu waxay u xilsaaran tahay:***

- a. Ilaalinta Habsami-ugu-dhaqanka wax-ka-bedelka iyo kaabista Xeerka Diiwaangelinta Codbixiyayaasha, Xeer-nidaamiyaha Dhaqangelinta

Diiwaangelinta Codbixiyayaasha, Xeerarka Doorashooyinka iyo Xeerka Hab-Dhaqanka Axsaabta Qaranka ee Diiwaangelinta Codbixiyayaasha.

- b. Xallinta khilaafaadka iyo murannada ka dhex dhasha xisbiyada dheddooda.
- c. Soo-saarista warbixino ku saabsan sida dhinacyadu ugu dhaqmayaan Xeerka Diiwaangelinta Codbixiyayaasha, Xeer-nidaamiyaha Dhaqangelinta Diiwaangelinta Codbixiyayaasha, Xeerarka Doorashooyinka, Xeerka Hab-Dhaqanka Axsaabta Qaranka iyo guud ahaanba Geeddi-socodka Diiwaangelinta.

### **3. Awoodda Guddida: Guddidu waxay awood u leedahay:-**

- a. Xallinta khilaaf kasta oo ka dhex-dhasha dhinacyada Xeerkan Hab-Dhaqan kala saxeexday;
- b. Hubinta meel-marinta Xeerka Hab-Dhaqanka Axsaabta Qaranka;
- c. Ka qaadista tallaabo anshax-marineed oo Xeerka Hab-dhaqan waafaqsan xad-gudub kasta oo Guddida ama wakiilladeedu ogaadeen dhicitaankiisa;
- d. Tallaabada anshax-marineed ee ay Guddidu soo saartaa ama qaaddaa wuxuu noqonayaa mid qaadashadiisu waajib ku tahay dhinacyada uu khuseeyo, si waafaqsan Xeerka Diiwaangelinta Codbixiyayaasha, Xeer-nidaamiyaha Dhaqangelinta Diiwaangelinta Codbixiyayaasha, Xeerarka doorashooyinka iyo Xeerka Habdhaqanka Xisbiyada (Code of Conduct).

### **4. Tirada Xubnaha Guddida iyo Qaabka Soo-Xulisteeda:**

- a. Guddidu waxay ka kooban tahay Toddoba aqoonyahan oo reer Somaliland.
- b. Guddidu waxa ay iska dhex doorayaan Guddoomiye, Guddoomiye Ku-xigeen iyo Xog-haye.
- c. Guddida waxaa soo xulaaya isla markaana magacaabaaya Komishanka Doorashooyinka Qaranka.
- d. Guddidu waxay lixda gobol-doorasho ee dalka ku yeelanaysaa min laba wakiil oo KDQ uu soo xulo. Iyagoo Guddidu u igmanaaya in ay waajibaadkooda ka fuliyaan Gobollada.

### **5. Shuruudaha Lagu Soo Xulayo Xubinta Guddida**

1. xubinta Guddida ahi waa in ay buuxiso shuruudahan hoos ku qoran:
  - a. In uu yahay/tahay qof sumcad wanaagsan ku leh bulshada.
  - b. Qof leh Go'aan qaadasho, karti, aqoon iyo waayo-aragnimo uu ku gudan karo mas'uuliyadda culus ee la saaray,

- c. Ku sifoobay dhexdhexaadnimo siyaasadeed.
- d. In uu leeyahay/leedahay xirfad uu ku qoro warbixin (report writing skills).

**2. *Muddada Xilka ee Guddida:***

- a. Guddidu heer qaran muddo xileedkeedu waa lix bilood oo laga bilaabo maalinta ay saxeexaan heshiiska,
- b. Gobolada xubnaha uga wakiil ka ah Guddidu waxa ay muddo xileedkoodu ku egyahay laba bilood oo ka bilaabmata maalinta heshiiska ay saxeexaan.

**3. *Wadashaqeynta Komishanka Doorashooyinka Qaranka iyo Guddida :***

- a. Guddida Illaalinta Habsami-u-socodka Diiwaangelinta way u madaxbaanaaneysaa hawlahooda shaqo, iyagoo marwalba la-tashi la yeelanaya Komishanka Doorashooyinka Qaranka.
- b. Wixii tallaabo anshax marineed ah ee ay Guddidu soo jeediso waxay u gudbineynsaa Komishanka Doorashooyinka Qaranka si loo fuliyo.
- c. Axsaabta Qaranku waa in ay wada shaqayn iyo gacanba siiyan Guddida Illaalinta Habsami-u-socodka Diiwaangelinta. Waana in ay ku taageeraan shaqadooda.

**QODOBKA 17<sup>AAD</sup>: XALLINTA KHILAFAADKA (CONFLICT RESOLUTION)**

- 1) Axsaabta Qaranku waxa ay muran iyo khilaaf kasta oo khuseeya diiwaangelinta codbixiyayaasha oo dhaxyimaada waxa ay ku xalin doonaan wada-hadal iyo is-afgararad.
- 2) Haddii ay Axsaabtu ku guulaysan waayaan in ay khilaafaadka khuseeya diiwaangelinta ee dhexdooda ah xalliyaan waxay u soo ban-dhigayaan Guddida Illaalinta Habsami-u-Socodka Diiwaangelinta.
- 3) Haddii arrintu ay tahay mid aanay waxba ka qaban karayn Guddidaasi waxaa loo soo gudbinayaa Komishanka Doorashooyinka Qaranka.

**QODOBKA 18<sup>AAD</sup>: CABASHOOYINKA**

- 1) Xisbi kastaa waxa uu Cabasho u soo gudbin karaa Guddida Illaalinta Habsami-u-Socodka Diiwaangelinta haddii uu u arko in lagu xad-gudbay Xeerka Diiwaangelinta, Xeer Nidaamiyaha iyo Xeerkan Hab-dhaqan.
- 2) Iyadoo lagu xisaabtamayo wakhtiga, Cabashooyinka la soo gudbiyo waa in si dhakhsa ah baadhis loogu sameeyo go'aanna laga gaadho;

**QODOBKA 19<sup>AAD</sup>: CABASHOOYINKA BEEN-ABUURKA AH**

Axsaabta Qaranku waa in aanay ku xad-gudbin xuquuqda soo gudbinta cabashooyinka. Waa in aanay samaynin cabasho been-abuur ah oo lagu jahawareerinaayo geeddi-socodka diwaangelinta.

#### **QODOBKA 20<sup>AAD</sup>: TALLAABOOYINKA LAGA QAADAYO CIDDA XEERKAN JEBISA**

Xisbi kasta ama hawl-wadeen Xisbi, xubin Xisbi iyo taageere Xisbi ee ku xadgudba Xeerkana, Guddida Ilalinta Habsami-u-Socodka Diiwaangelinta waxay ka qaadanaysaa go'aamo anshaxmarineed sida:

- 1) Digniin caadiya;
- 2) Digniin qoraal ah;
- 3) Haddii xadgudubyada dhacay ay noqdaan kuwo ka culus awoodda Guddida Ilalinta Habsami-u-Socodka Diiwaangelinta ama xad-gudubyada dhacay ay yihiin kuwo dambi ciqaabeed ka dhalan karo, waxaa Guddida Ilalinta Habsami-u-Socodka Diiwaangelinta u gudbinaya Komishanka Doorashooyinka Qaranka;
- 4) Wixii khilaaf ah ama farsamo ah ee xallintoooda laga waayo Dastuurka Qaranka, Xeerkana Diiwaangelinta Codbixiyayaasha, Xeerkana-nidaamiyaha Dhaqangelinta Diiwaangelinta Codbixiyayaasha, Xeerkana Doorashooyinka iyo Xeerkana Hab-dhaqanka Xisbiyada waxa xal ka gaadhaya Komishanka Doorashooyinka Qaranka iyaga oo la tashanaya Guddida Ilalinta Habsami-u-Socodka Diiwaangelinta.

#### **QODOBKA 21<sup>AAD</sup>: KU DHAQANKA IYO WAX KA BEDDELKA XEERKAN**

- 1) Xeerkana Hab-dhaqan nuxur ahaan wuxuu waafaqsan yahay shuruucda doorashooyinka ee dalka u yaalla sida: Dastuurka Qaranka iyo Xeerkana Doorashooyinka iyo Diiwaangelinta.
- 2) Xeerkana Hab-dhaqan waxaa lagu dabaqayaa xaaladaha aanay xeerkana dalka ee diiwaangelinta iyo doorashada khuseeyaa wax ka jidaynin.
- 3) Xeerkana waxaa lagaga dhaqmaya xarunta dhixe ee diiwaangelinta ee KDQ, xarumaha diiwaangelinta gobollada iyo degmooyinka iyo goobaha diwaangelinta.
- 4) Xeerkana waxaa ku dhaqmaaya fulintiisana ilalintaya Axsaabta Qaranka iyo KDQ.
- 5) Wax ka beddelka Xeerkani wuxuu ku iman karaa marka dhinacyada wada saxeexay ay ka wada tashadaan kana heshiiyaan waxa lagu darayo iyo waxa laga saarayo.

#### **QODOBKA 22<sup>AAD</sup>: AWOODDA SAXEEXA**

Xeerkana Hab-dhaqan waxaa Xisbiyada Qaranka u saxeexaya Guddoomiyeyaasha Axsaabta Qaranka.

**WAXAA LAGU SAXEEXAY HARGEYSA, MAANTA OO AH KHAMIIS TODOBADA BISHA KOWAAD EE SANADKA LABADA KUN IYO LIX IYO TOBANKA.**

**XISBIGA KULMIYE:**

**Mudane: Muuse Biixi Cabdi**  
**Guddoomiyaha Xisbiga KULMIYE**

---

**XISBIGA UCID:**

**Mudane: Eng. Faysal Cali Xusseen**  
**Guddoomiyaha Xisbiga UCID**

---

**XISBIGA WADDANI:**

**Mudane: Cabdiraxmaan Maxamed Cabdillaahi (Cirro)**  
**Guddoomiyaha Xisbiga WADDANI**

---

**KOMISHANKA DOORASHOOYINKA QARANKA:**

**Eng. Abdiqadir Iiman Warsame**  
**Guddoomiyaha Komishanka Doorashooyinka**

---